

中國方志叢書・華中地方・第七七七號

據

清・譚尚書纂修輯
清同治十一年刊本

影印

江 西 省

禾川書

(二)

成文出版社有限公司印行

禾川書卷第八

永新譚尙書述唐纂輯

尙适容亭

同懷弟尙禮陸可叅閱

尙潔秀圓

男從忠少侯校字

寓賢

先民有言不地著則離鄉輕家民如鳥獸後世相率重故里
有旅而居者雖賢達輒目爲流民夫商賈輻輳錄錄無足數

賢哲所經山川生色而流俗莫之重予嘗觀岐山僻在西壤
上世罕有聞鳳凰一鳴天下莫不仰岐山華陰之先草茅不
甚著自鸞集槐木名遂以傳由是觀之名賢杖履之所至其
足爲地方倚重不誣也永新彬彬文雅甲於廬吉雖不藉重
他邦之人才然海內談相鄉輒自姚牛始以流民概之顧不
過歟予搜羅徃跡作寓賢書用次名宦後志景仰也雖然徃
來舟車此邦日絡繹不絕而傳者寥寥嗚呼豈非以人哉

唐

姚崇字元之陝州硤石人世傳崇父宦蜀中崇從母寄居縣北

十里有臺曰聰明遂舍其上嘗讀書禾山甘露寺及元陽觀
母死葬縣治東舊學宮左墓至今尙存崇歷官中書令謚文
獻

牛僧孺字思黯涇州人其祖遠仕交廣罷秩至郴衡間爲山賊
所擄掠唯僧孺母子獲存遂入江南止於縣之北有山名絮
芋源下有古臺古老傳爲聰明臺其下有湧水曰聰明泉僧
孺乃舍其上而肄業迨十數年博有文學會母死遂葬於縣
之西南才德鄉大學里旣隨計長安擢上第不數十年累秩
相輔

按二相寄跡吾邑前人紛紛聚訟予考唐李遠送賀著作
序云吾聞牛僧孺之言永新與荆楚爲鄰君子好義而尙
文小人力耕而喜鬪則芋源聰泉實牛公托跡之所非傳
會也觀於牛而姚可知矣夫同人莫大于野有功必交出
門子美生襄陽幼時家貧客吳越齊趙間永叔少家潁北
宦達後仍稱廬陵太史公周覽名山勝水與燕趙雄俊交
遊蘇次公過秦漢故都慨然想見古之豪傑大丈夫志在
四方安能長作鹿豕聚耶卽以吾邑言之地雖號爲通衢
非歸京兆之捷徑山雖名爲巖險豈若厭原之幽深鄙陽

侯由洪州避地何以舍彼取此張翊之父自番禺還籍竟
爾紆道儻居行止各隨其志徙倚甯有定所又何疑二公
之寄棲此都也哉彼刻舟求劍者流暖暖姝姝亦曷取四
百年中三出相之咏而三復之也 肇史載有賀革會稽

人仕梁爲五經博士出爲湘東王諮議叅軍歷仕州郡及
唐武德五年改授南平監州任滿因家永新之田東按梁
書賀革傳革山陰人起家晉安王國侍郎兼太學博士侍
湘東王讀敕于永福省爲邵陵湘東武陵三王講禮稍遷
湘東王府行叅軍轉中書議曹郎尋除秣陵令遷國子博

士出爲西中郎湘東王諮議泰軍帶江陵令王初於府置
學以革領儒林祭酒前後再監南平郡爲民吏所德尋加
貞威將軍兼平西長史南郡太守大同六年卒官時年六
十二攷梁武帝大同六年庚申下距唐高祖武德五年癸
未八十四載時革之墓木已合抱矣安得生死骨肉歷事
四姓哉乃蓮花廳志又云武德五年僞刺史彭玕據險立
金城寨民不堪命詔以革爲南平監州鎮撫之革至玕走
楚南則不知玕爲吉州刺史在昭宗天復元年末去武德之
時尙後數百年原其失在誤信李秋洞琴亭冰記之謬文

而不攷唐書鍾傳傳也又王志於賀革傳末添註小書云
擇以孝廉授初品爵昇卿任職布政按徐度卻掃編宋朝
制科初因唐制有賢良方正能直言極諫經學優深可爲
師法詳明吏理達於教化凡三科真宗咸平中詔舉賢良
方正一人景德中又詔置賢良方正能直言極諫博通墳
典達於教化才識兼茂明於體用武足安邊洞明韜畧運
籌決勝軍謀宏遠材任邊寄詳明吏理達於從政等六科
並無孝廉名目也攷兩漢晉宋有孝廉科厥後久廢唐代
宗廣德元年楊綰請置孝廉科代宗不從至明太祖始有

此輩洪武二十年二月己丑以孝廉李德爲應天府尹是也賀擇生宋初何緣而以孝廉授初品爵哉至於十二省承宣布政使司始置於洪武九年宋時並無此官昇卿雖欲任是職其可得乎廳志於宋朝取士設官不加深攷并不知宋真宗無咸和年號又不查永新志所載宋代薦辟二十一人并無昇卿之名漫據其說益以訛傳爲二子立傳一則曰賀擇革十六世孫以孝廉授初品爵真宗咸和壬寅被徵不起一則曰賀昇卿淳熙中辟舉召對稱旨授職官至布政其謬可究詰哉又毫史載有蕭直汴州人唐

封永新侯遂留家子昕咸通間任大理評事孫拱
三傳至儼按唐書本傳昕字中明梁鄱陽王恢七世孫再
中博學宏辭調壽安尉累遷左補闕肅宗立歷中書舍人
禮部侍郎代宗守陝昕由武關從帝擢國子祭酒大歷中
持節弔回鶻轉工部尚書封晉陵侯德宗出奉天昕至遷
太子少傅爵郡公兼禮部尚書知貢舉久之以太子少師
致仕卒並非懿宗時人亦未爲大理評事也梁書蕭直豫
章王綜子普通六年封永新侯韋史誤以梁書普通爲唐會
昌竟以鄱陽王恢之七世孫爲永新侯蕭直之子不知其

時代相去甚遠也況據解縉蕭氏族譜序中述周益公所
作源流記稱唐宰相復觀察湖南子儉留居長沙儉子文
元兄弟唐末徙居吉水傳至晟諱球生二子次日霖字處
仁居永新生儼所次世系殊不相合未便承訛乃吉安盧
志於賀擇賀昇卿蕭直三人一概採入二賀陷於不知不
足深責若蕭直則封爵表旣據梁書謂普通六年策封永
新侯而寓賢傳又據縣志作唐會昌間事豈不可笑甚哉
尹濯汴州人仕唐廣明間爲平南將軍累功封鄱陽侯黃巢入
廣竊改廣州刺史以靖其亂巢平留鎮洪州居洗馬池朱溫

代唐即據汴濶恥事二姓遂避地永新家焉

按髣史載有張翊予旣據十國春秋改入人物矣又有青州張德廣名欽唐天復間承討僞刺史彭玕方營寨壘玕卽奔馬殷以功封開國男監丞新秩滿因家焉攷天復元年彭玕爲吉州刺史雖鍾傳所署實唐室之命也惡得以僞目之且其時雄據要害方與淮南爭衡未嘗遽奔馬殷及天祐三年傳卒子匡範爲江州刺史怨兄立挈江州附淮南楊渥使秦裴攻匡時執之彭玕旣失援厚結馬殷且觀虛實使者還遂歸欵豫章書云天祐六年七月淮南遣

歷本城吉州譚玕帥眾奔楚合二說觀之則玕歸馬殷尙在天復後九年髦史疑有訛再按解大紳張氏族譜序後唐有譚德廣者清河縣平陸人也以清遠軍節度使監永新鎮因家焉嘗讀郡志云吉水有張欽寨者楊吳遣欽擊彭玕於此對壘後玕與戰於楓崗再戰再敗遂奔馬殷欽因留鎮永新以遏之與此譜合而名字皆不同不知何以云也且唐末自楊氏據江淮與青齊接境監州公青州人其必仕於楊氏而譜曰後唐其又他有所據與崇德叔豫今方修續此譜幸以他書攷正焉今髦史所載與解序異

或者張氏見解公所云改後唐爲唐天復又以敘與欽二字形相似曲爲附合髦史因之然解序明云諱德廣又曰名字俱不同則必別有字可知乃以名爲字又別爲立名更覺非實

宋

甘廷珪奉新人登紹興五年進士僉判吉州因家永新之逢橋吉安府志云廷珪先世由豐城徙建昌與縣志同按江西選舉志註稱廷珪奉新人舊志誤作豐城人則縣府兩志皆訛也今改正

元

李祁字一初號希蓮茶陵人元統元年登李齊榜進士第二人
始應奉翰林文字以母老就養江南授婺源州同知遷江淞
儒學副提舉既丁母憂解職值元季亂慨然欲效一障以死
而不可得又以爲委贄事人不可終負遂不出入明朝力孫
徵辟隱居永新上麓山中自號危行翁千戶俞茂師事之爲
梓其雲陽希蓮等集以傳性恬淡不以物累自撓每遇佳山
水輒散步臨眺忘歸意泊如也洪武初卒葬邑之雷公峽

按李東陽表希蓮墓云先生爲江制儒學副提舉閩本一

統志於永新流寓書遼陽提舉者蓋傳刻之誤元江淞所
刻宋史有提調官名氏可證也今江西通志猶沿一統志
之訛豈未見宋史並未見此表歟又按又尙集以祁入永
新鄉賢謬也吉安盧志藝文志云雲陽集永新李祁撰亦誤

人物

永新建縣千餘年磊落奇士名登大史之策者寥寥豈真無
人王介甫所謂後世無諸侯之史非尊爵盛位雖雄奇俊烈
道德滿衍輒不得見於史蓋比比然矣大丈夫抗懷三代上

之位天常建人極次亦敢行誼爲鄉黨表帥當其初祇求無愧於心斯已矣身後名何暇計然李翰不爲許遠立傳昌黎甚恨之今唐書所載許遠傳皆韓筆也嗟乎閭巷之士欲砥行立名者非附青雲之士惡能傳於後世豈不信哉韓子曰發潛德之幽光孔子曰君子博學於文史策雖闕然百家之編可攷也網羅天下放失舊聞矜奇誇多而鄉先生歿聲不出里巷職誰之過與予用是錄其史策之所已載者其餘稽往乘旁及他書正其謬疑者闕之豈敢謂補史策缺遺然芳規芳躅猶不至湮沉或畢我後生晚進之責也嗚呼彼名